

سلسلة مبادئ في الحياة الروحية
.. (١٠/١٢)

كيف أعمل مع الله (٤) مستويات العمل

.. إعداد

بيت محبة الله

..

....

اسم الكتاب : سلسلة مبادئ في الحياة الروحية.

إعداد: خدام بيت محبة الله للطلبة المغتربين.

رقم الإيداع: ٢٠١٦/٧٤٥٥

الترقيم الدولي: ٩-٨٥٩-٠٣-٩٧٧٩-٩٧٨-I.S.B.N

* لنا رجاء فى المسيح ان تصل هذه
السلسلة إلى يد كل شاب مسيحي بأقل
تكلفة.

*يمكنك ان تشاركنا هذا الرجاء بإهداءها
لأصدقائك واحباءك.

ملاحظة: للإستفادة الكاملة من هذه السلسلة الرجاء قرأتها بترتيب

الأجزاء كاملة فعدم الترتيب يمكن أن يسبب تشويش وعدم الاستمرار

قد يسبب إحباط.



قداسة البابا تواضروس الثاني

بابا الإسكندرية وبطريك الكرازة المرقسية (١١٨)

وأنا سائر للقاء أبي الروحي وجدت في الطريق رجلاً فقيراً متعباً ومريضاً، فقلت في نفسي "يا هـ الرجل دا شكلك مريض وتعبان جداً، لكن للأسف مش معايا غير مبلغ صغير، كان نفسي أساعده بأكثر من كدا. ربنا يساعده ويشفيه".

وقلت لنفسي "لكن هل الرجل الفقير دا واثق في أبوة الله وغفرانه ولا لا، هل عنده رجاء في الحياة الأبدية ولا لا!! كدا هايبقى في تعب هنا وهناك. طيب يارب أنا ممكن اعمل له إيه!! صعب أكلمه عن الأمور دى، وبرضه حرام أسييه كدا تعبانه!! خلاص أسأل أبي الروحي وأشوف هايقول إيه!!

وصلت لمغارة أبي وجدته منتظرني فسلمت عليه.

فقال: حمد على سلامتك.

قلت: الله يسلمك يا أبي.

قال: إيه أخبارك في العمل مع الله يا ابني.

قلت: بنعمة ربنا بدأت زى ما قلت لى، كل يوم الصبح بأصلى صلاة العمل. بس لسه برضه مش عارف أبدأ إزاي. النهاردة وأنا جاي شفت حد فقير ومريض، وفكرت هل هو

مستمتع بأبوة الله ولا لا، هل عنده ثقة في أبدية سعيدة ولا لا. وفكرت إزاي اساعده، بس قلت أسأل قدسك في الأول.
قال: اليوم هانتكلم عن موضوع مهم في كيفية العمل مع الله وهو **مستويات العمل.**

قلت: يعنى إيه مستويات العمل مع يا أبونا؟

قال: وجود الدافع جواك إنك تتكلم عن المسيح، دا شيء مهم ورائع، ولكن إزاي نترجم إدراكنا ومشاعرنا ونساعد الناس إنها تتمتع بأبوة الله، وتتق في الغفران وفي الأبدية السعيدة. دا اللي هانتكلم عنه النهاردة بالتفصيل.

قلت: ياريت يا أبونا. لأنه في أوقات كتيرة بيكون جوايا اشتياق إني أتكلم عن المسيح لكن بأكون مش عارف ابدأ منين؟
قال: فيه ثلاثة مستويات للعمل مع الله، فالموضوع مش مجرد كلام بس. فأول مستوى للعمل مع الله هو

الإشتياق.

قلت: يعنى إيه مستوى الإشتياق؟

قال: مستوى الإشتياق، هو المستوى الأول للعمل مع الله، وهو متاح للجميع. والكل مطالب به. وزى ما بيقول الكتاب المقدس "الأمين في القليل يقيمه الله على الكثير" (مت ٢٥ : ٢٣)،

فالأمين في المستوى دا مع الوقت هانمو ويدخل في المستويات الثانية. ومستوى الاشتياق هو إنك توزع إشتياقات.

قلت: مش فاهم يا أبونا يعنى إيه أوزع إشتياقات. ممكن قدسك توضح اكتر؟

قال: توزع إشتياقات الخلاص

فالإشتياقات هي صلوات بسيطة

وسريعة، ممكن تصليها من اجل كل

شخص بتشوفه.

فالتطبيعي إننا بنشوف ناس كتير كل يوم، ناس في الشارع،

ناس في المواصلات، ناس في الشغل، فلما يكون جونا دافع

قوى، هانصلي من أجل كل الناس دى. فمكتوب في (١ تي ٢

: ١) "فَأَطْلُبُ أَوَّلَ كُلِّ شَيْءٍ أَنْ تُقَامَ طِلَبَاتُ وَصَلَوَاتُ وَابْتِهَالَاتُ وَتَشْكُرَاتُ لِأَجْلِ جَمِيعِ النَّاسِ".

هنا بولس الرسول بيقول **أول كل شيء**، يعنى أهم كل

شيء، إننا نصلى من اجل خلاص الناس، فخلاص الناس هو

أهم حاجة بالنسبة لله، فكل شخص هو ابن لله وقيمه تساوى

دمه، وإنك تصلى من أجل كل الناس اللى بتشوفهم دا حاجة

سهلة، وفما فيش حد يقدر يعطلك أو يمنحك إنك تصلى.

قلت: طبعاً هاأصلى فى سرى، وما حدش يقدر يمنع حد عن الصلاة. لكن ها اصرى أقول إيه؟

قال: تصلى لكل واحد بتشوفه وتقول

رب حرره ونور هه و قدسه".

يعنى يارب حرره من سلطان الخطية، ونوره بنور المسيح، و قدسه بالروح القدس.

قلت: يعنى لما أقول الكلمتين دول إيه اللى ها يحصل؟!

قال: دول مش مجرد كلمتين، دى صلاة والصلاة ليها فائدة كبيرة يا ابني، فلما تقول كدا لكل حد بتشوفه الروح القدس ها يعمل فى جواه ويقول له

"ليه ما تأمنش بالمسيح، المسيح بيحبك، هو فداك ومات علشانك، معاه مافيش خوف، معاه فيه ضمان للحياة بعد الموت، معاه فيه غفران لكل ذنوبك، لما تأمن بالمسيح، الله هايبقى أبوك، يعنى تقدر تقول لله "يا أبانا"، وها يكون عندك سلام ما بعده سلام، وفرح ما بعده فرح، هنا وبعد الموت. فالمسيح هو الفرح، والمسيح هو الحياة، آمن بيه وقوله أنا عاوز أكون معاك فى السماء، وهو هايقبلك ويعرفك الطريق، فهو الطريق والحق والحياة".

فزی ما قلنا قبل کدا، الله بـعرض نعمته ومحـبته للإنسان،
والشیطان بـعرض شره وخطیته.

والناس الأشرار بیساعدوا الشیطان فی عمله بكل همـة
ونشاط.

وإحنا المفروض نساعد الله فی عمله، لكن للأسف ما
عندناش غیرة زی غیرة الناس الأشرار، فی مساعدتهم لابلیس فی
أمر الشر والخطیة، فشوف کمية الشر والخطیة اللى مالیه العالم
أد إیه!! مکتوب "لأنَّ أبنَاءَ هَذَا الدَّهْرِ أَحْكَمُ مِنْ أبنَاءِ النُّورِ فی
جِیلِهِمْ." (لو ١٦ : ٨)

فضرورى یكون عندنا غیرة إننا نوصل کلمة الخلاص لكل
الخلیقة، فإحنا علینا مسئولة کبیره، ناحیه خلاص كل البشر.
فالمسیح منتظر مننا إننا نساعده ونعمل معاه، بیقول القدیس
یوحنا فم الذهب "المصباح لا یضئ لذاته بل للجالسین فی
الظلمة، وأنت مصباح لا لتتمتع وحدک، إنما لترد إنسانا ضل،
لأنه أی نفع لمسیحی لا یفید غیره، ولا یرد أحداً إلی الفضیلة".
وإحنا معانا إمکانیه کبیره، وهی إمکانیه الصلاة وتوزیع
اشتیاقات الخلاص، وهی سهلة ومتاحة للكل، فالله عاوز یقول
لكل واحد فینا:

"تعالوا يا أولادى اعملوا معايا، أنا محتاج مساعدتكم، علشان توصلوا محبتى وغفرانى لكل البشرية. وزى إبليس ما فيه ناس بتعمل معاه، أنا عاوزكم تعملوا معايا، عاوز يبقى عنكم غيرة وحرارة على خلاص إخوتكم في البشرية، أنا فديت العالم كله وكل العالم ولادى، حتى الناس الأشرار اللى بيعملوا مع إبليس وبيقاومونى، هم برضه ولادى وخليقتى، ونفسى إنهم يعرفوا الحق، ويعرفوا محبتى ليهم ويرجعوا لأحضانى، وانتوا اللى هاتساعدونى، وزعوا اشتياقات الخلاص على كل اللى بتشفوه، فالكل محتاج خلاصى، واعرفوا إن كل اشتياق لخلاص الناس، ليه قوة وفاعلية، وهايجيب ثمر في الوقت المناسب، فضرورى تعرفوا إن الصلاة لا تموت".

فخسارة كبيرة إن بعد المسيح ما جه ومات وإدانا الغفران والأبدية، إن ناس كتير تفضل مش عارفه ولا قبله غفرانه. فالشخص الفقير اللى شوفته وأنت جاي النهاردة. حتى لو ساعدته بمال الدنيا كلها، ولو إتعالج فى أفضل المستشفيات،

لكن لو فضل محروم من معرفة المسيح وأبوة الله فيه، وماكنش عنده رجاء الأبدية السعيدة، فكل متع الدنيا مش هاتفيده في أي حاجة!!

قلت: يعني كدا الواحد ما يساعدش الفقراء؟

قال: مساعدة الفقراء حاجة مهمة جدا يا ابني. وبتدل أن جوانا محبة المسيح. وبحسب طاقة كل واحد وإمكانياته هو مطالب أنه يساعد الفقراء.

لكن الخطر كل الخطر، إننا نكتفى بكدا، فلو اكتفينا بكدا، هانكون زى الجمعيات الأهلية اللى بتساعد الفقراء، ودى ممكن يعملها حتى الملحدين، وفيه منظمات وهيئات غير مسيحية كتير بتساعد الفقراء والأيتام.

قلت: تقصد إيه أبونا؟

قال: الاكتفاء بالأمر المادية أمر في غاية الخطورة، ويخلى عمل الكنيسة، عمل إجتماعى بحت. لكن عملنا الرئيسى يا ابني هو الشهادة للمسيح. وإعلان الخلاص لكل إنسان، وهى دى المسيحية. بيقول الأب تادرس يعقوب ملطى "فهم المسيحيون في الكنيسة الأولى، إن المسيحية هي دعوة للخلاص"

(فالمسيحية بإختصار هي قبول الخلاص والكراسة بيه)

والخلاص يعنى الغفران والأبدية. ودى رسالة المسيح،
فالافتاء بالأمور الاجتماعية والأنشطة، شيء فى منتهى
الخطورة، والتلاميذ كانوا فى منتهى الوعي واليقظة للفخ دا من
زمان يا ابنى

قلت: وإيه هو الفخ دا يا أبونا؟

قال: الفخ إن يتحول كل عملنا مع الله، لعمل إجتماعى
وبس، يعنى نهتم بمساعدة الفقراء والأرامل والايام والأنشطة
والمهرجانات ونكتفى بالدور دا، علشان كدا آباءنا الرسل كانوا
واعين جدا للفخ الخطير دا، ففي سفر الأعمال الإصحاح
السادس، حدث تدمر من اليونانيين بسبب تقصير فى الخدمة
لأرملهم، لكن التلاميذ ما إنشغلوش بالخدمة الاجتماعية وفى
نفس الوقت لم يهتموها، لكن انتخبوا مجموعة إهتمت بخدمة
الفقراء وهم قالوا " لا يرضي ان نترك نحن كلمة الله و نخدم
موائدانتخبوا أيها الأخوة سبعة رجال منكم مشهودا لهم
ومملوین من الروح القدس و حكمة فنقيمهم على هذه الحاجة.و
أما نحن فنواظب على الصلاة و خدمة الكلم (أع ٦ : ٢-٤)
فمن القديم والكنيسة عندها وعى بالرسالة الأولى ليها،
وبهدفها الأساسى، اللى هو خلاص النفوس والكراسة باسم

المسيح، ودى مهمة كل شخص مسيحي، ورسالة كل واحد اتمتع بالغفران وعنده رجاء الأبدية السعيدة. فهو ما يقدرش يسكت ويسيب إخوانه في البشرية محرومين من محبة المسيح ونعمة أبوته. دى المهمة الأولى بتاع كل شخص مسيحي يا ابنى لكننا للأسف مقصرين ومشغولين عنها.

قلت: بس فيه مشكلة يا أبونا إحنا مشغولين جدا، فيه مسئوليات كتير، يمكن دا هو السبب في تقصيرنا في الكرازة؟! **قال:** الموضوع مش في المشغولية ولا في كتر المسئوليات، ولكن في الإدراك.

قلت: إزاي يا أبونا؟

قال: لو أدركت أنه بسبب اشتياقات الخلاص، اللى هاتصليها في قلبك، ممكن أن ناس كتير تتمتع بحب المسيح، مش هاتنسى.

فالحرمان من محبة المسيح، هو ذا الجحيم الحقيقى.

فالناس مش محتاجة تموت، علشان تعرف يعنى إيه الجحيم والعذاب. فكل شخص محروم من محبة المسيح، هو في الحقيقة غلبان ومسكين. فاللى محروم من حب المسيح ومن أبوة الله،

هو من هنا في جحيم، مش مستنى جحيم أكثر من كدا، ربنا
يعينه ويفتقده.

قلت: إزاي يا أبونا مش فاهم؟

قال: محبة المسيح، دى حاجة عميقة جدا ومشبعة جداً. أبوة
الله بتدى فرح ما بعده فرح. واللى وثق وتذوق حب المسيح
وعرف الغفران الكامل، هايعطف على إخوته لأنه هايبقى
عارف حرمانهم وغلبهم. هاقول قصة يا ابني. شاب من منطقة
فقيرة جدا، سافر سويسرا، وهناك كملّ تعليمه ووصل لأعلى
الدرجات العلمية، وبعد ٢٠ سنة رجع لاهله، فلقاهم لسه فقراء
وتعبانين، والشوارع ملايانة قاذورات، وطفح المجارى في كل
مكان، فقال لهم:

-إزاي أنتوا عايشين كدا، الدنيا صعبة قوى والتلوث بقى
حاجة صعبة جداً!!

فأمة قالت (باستغراب): يعنى إيه يا ابني تلوث!! الدنيا
كويسة وأدى إحنا عايشين كدا من ساعة ما إتولدنا!!
فقال لها الابن تلوث يعنى الريحة مش حلوة، والجو مش
صحى. ممكن نشوف لكم مكان أحسن من كدا شوية؟!

قال أبوه :إحنا إتعودنا على كدا، هو فيه أحسن من كدا.
الدنيا تمام وأدى إحنا عايشين زى ما أهلينا عاشوا!!
فرد الابن وقال بس طالما فيه حاجة افضل ليه ما نستمتعش
بيها. ها أشوف لكم شقة في مكان هادئ ونضيف، ومكان
يبقى فيه خضرة وتستريحوا شوية، طالما فيه إمكانية إننا نعمل
كدا!!

فقال الأم(بيأس) يا ابني ما تتعبش نفسك. وهو إحنا صح
تعبانين، لكن مش فاهمين الكلام اللى أنت بتقوله دأ!!
فتوسل إليهم الابن وقال: تعالوا جربوا ولو ما عجبوكمش
الحال يبقى ارجعوا تانى. مش هاتخسروا حاجة. هتلاقوا فرق
كبير في الراحة والهدوء والسلام.

قال: وبعد مجهود ووقت طويل، إقتنعوا إنهم يجربوا شقة
جديدة في منطقة راقية، وبعديها:

قالت الأم(بفرح) ما كناش عايشين، إزاي كنا محرومين من
كل الراحة دى!! إحنا كأنا كنا ميتين!!

وقال الأب: إحنا كأنا اتقلنا من الجحيم، للنعيم!! إحنا
بقينا كأنا في الجنة!!

قال: فاللى عايش طول عمره محروم من محبة المسيح، واللى ماجربش أبوة الله، واللى لسه الغفران بعيد عنه، هو إنسان غلبان ومسكين، ومحتاج إننا نكرز ليه ونقوله تعالى وانظر، تعالى وجرب محبة المسيح، تعالى وثق في غفران المسيح، هو دا الفرح الحقيقى والأبدية السعيدة، بيقول القديس امبروسيوس

"هل يمكن أن يوجد من هو أسعد من المسيحى؟! هذه اللحظة التي أعيشها هي أسعد لحظات عمرى في الرب، لست أحزن على عبور الماضى ولا أخشى المستقبل، بل كل لحظة أشعر بأنها أسعد من كل ما قد عبر".

قال: فالله في المسيحية مش عاوز منا فروض ولا عبادة، لكن عاوز يدينا حبه وغفرانه، الله في المسيحية هو الله الطيب المتواضع اللى بيغسل أرجل ولاده، ويبشلمهم في حضنه ويضمم جراحهم، الله في المسيحية بيتحمل ضعفنا، ويمسح دموعنا، وبيطهر ذنوبنا، ومستنينا في الأبدية السعيدة. محتاجين يكون عندنا أمانة وإجتهاد في الصلاة من أجل جميع الناس، بص حوليك فما شابهناش حد!! لا اللى بيتكلم في السياسة ولا اللى بيشجع الكورة، ولا اللى بيتابع الفن، الكل عنده حماس وغيره وإحنا في بلادة عظيمة.

قلت: بس فيه ناس بتقول إن المسيح قال للتلاميذ بس إنهم اللى يكرزوا!

قال: آمال إحنا تلاميذ مين؟! تلاميذ إبليس!! إحنا تلاميذ المسيح يا ابني، فالرب يسوع قال امضوا وتلمذوا جميع الأمم (مت ٢٨: ٢٤)، يعنى جميع الأمم تلاميذ، كل اللى بيآمن بالمسيح هو تلميذ للمسيح، ومطالب إنه يتكلم عنه ويكرز بيه. فكتير من أمم العالم محرومة من معرفة الله ومن محبة المسيح. ونعمة المسيح متاحة لكل، محتاج بس اللى يوصلها، فالعيب بس في حلقة التوصيل، اللى هم إحنا.

قلت: ولكن تيارات الخطية والإثم شديدة في العالم الأيام دى مش زى أيام التلاميذ!!

قال: ما تقلش كدا يا ابني، فاللى معانا أقوى من اللى في العالم، فقوة الله أعظم وأقوى من كل تيارات الشر، ومحبة المسيح تقدر تجذب أى إنسان من مستنقعات الإثم، وتحرره وتشبعه، فمحبة المسيح فيها الشعب وفيها الكفاية. كما إن حال العالم دلوقتى لم يختلف عن حاله أيام التلاميذ.

قلت: إزاي يا أبونا، الايام دى بقى فيه انت والإباحية والإلحاد، وافتكرك أن دا ما كنش موجود أيام التلاميذ!!

قال: أيام التلاميذ ماكنش مجرد نت ولا صور إباحية، لكن كان طقوس العبادة نفسها إباحية، وكان فيه سحر افسس، وإلحاد أثينا، ولكن مجموعة من الصيادين الفقراء والجهلاء، غيروا العالم، وأناروه بمعرفة الإنجيل. لأنهم إمتلأوا بالروح القدس **(فاللى يمتلئ بالروح القدس هو اللى يقدر يغير المسكونة)**

قلت: بس أبدأ ازاي يا أبونا. هل فجأة ها أكون زى التلاميذ واكرز في العالم كله؟

قال: نرجع تاني لمستوى الاشتياق، هو مستوى سهل وبسيط ومتاح للجميع، وممكن لأى حد يكرز وهو في مكانه، من غير ما يروح لافريقيا ولا لآسيا، ومش ها يأخذ وقت، فإنك تصلى من أجل كل واحد بتشوفه، وتقول "حرره ونوره وقدس"، دا بيكون كرازة وعمل عظيم قدام الله.

قلت: موضوع سهل وبسيط. لكن هل ليه فاعلية يا أبونا؟!!

قال: طبعا يا ابني ليه فاعلية كبيرة. فالمشكلة يا ابني إننا نفتكر إننا إحنا اللى بنغير الناس أو كلامنا هو اللى بيغيرهم!!

قلت: طيب إيه اللى بيغير يا أبونا؟!

قال: الروح القدس هو اللي بيغيّر الناس. فمكتوب في .
وَلَيْسَ أَحَدٌ يَقْدِرُ أَنْ يَقُولَ: «يَسُوعُ رَبُّ» إِلَّا بِالرُّوحِ
الْقُدُسِ" (١ كو ١٢: ٣)

قال: فالروح القدس هو اللي بيخلى الناس تآمن بالمسيح،
وهو اللي بييكت الناس ويخليهم يتوبوا، والروح القدس بيعمل
من خلال كلامنا أو من خلال صلاتنا، فلما بنشتاق ونصلى
صلوات قصيرة، الله بيقدّرها ويسمعها ويستجيبها، والأمين في
القليل اللي معاه هنا، في السما الله هايكافأه بالكثير، وهايكون
زى الرسل والتلاميذ، فممكّن في السما واحد من الخدام،
يشوف حد زميله في الخدمة فوق جنب بولس الرسول، فيقوله
مايكل: يا بيتر. يا بيتر، تعال كلنا هنا، كل الخدام بتوع
الكنيسة هنا!!

بيتر: ماقدرش الملاك قالى خليك هنا دا مكانك!!
مايكل: يا ابني تعالى دا انت كدا جنب بولس الرسول،
تعالى بلاش كبرياء لحسن يجي يخرجوك؟
بيتر: ما أقدرش أتحرّك من نفسى!! الملاك قال لى أنت
مكانك هنا.

ولما جه واحد من الملائكة عدى جنب مايكل قاله؟!!

مايكل: هو صح يا ملاك، إن بيتر مكانه هناك جنب بولس الرسول؟!

ملاك: فعلا يا مايكل، مكان بيتر هناك جنب بولس الرسول.

مايكل: إزاي دا كان معانا في الخدمة، وكان شخص عادى ما كرزش لا في الهند ولا في الصين. إزاي يبقى جنب بولس الرسول، اللى قضى حياته كلها في الكرازة في كل دول العالم. ملاك: أصل بيتر كان أمين في الاشتياقات. ما كنش بيعدى عليه وقت غير لما يصلى لكل الناس اللى بيشوفهم، في الشارع، وفي المواصلات، وفي الشغل، ودى كانت وزنته وهو كان أمين فيها. فالله كافأه على أمانته.

مايكل: معقولة علشان مجرد إن كان بيشناق يكون زي بولس الرسول!!

ملاك: أيوه يا حبيبي. فالله يبص للامانة والمحبة اللى الواحد بيقدم بيهم الخدمة، والواحد بيتكافأ بالنسبة مش بالكمية. قلت: حقيقي يا أبونا!! دى حاجة ممكن تحصل ولا مجرد قصة؟

قال: دى حقيقة ممكن تحصل يا ابني مش مجرد قصة،
فالمكافأة بتكون "بالنسبة مش بالكمية".

قلت: يعنى إيه المكافأة "بالنسبة" "مش بالكمية"؟!

قال: ركز معايا وانا هاشرحلك يا ابني، يعنى تخيل لو أب
بطريك، الله إداله مائة وزنة، واستثمرها وبني كنائس، وعمر
أديرة، ووعظ وألف كتب، ورسم أساقفة وكهنة، وجاب
تسعين وزنة، يبقى كدا جاب كام في المية؟!

قلت: يبقى تسعين في المية.

قال: تمام، ولو أب أسقف أخذ خمسين وزنة وتاجر وتعب،
وبني كنائس، ورسم كهنة وشماسة، وعمل مباني خدمات
ومستشفيات، وجاب سبعة وأربعين وزنة، يبقى كدا كام في
المية؟

قلت: يبقى ٩٤ في المية.

قال: تمام. ولو بواب كان شخص غلبان وطيب، الله إداله
وزنة واحدة، فكان ليه علاقة عميقة مع المسيح، وربى ولاده
تربية مسيحية حقيقية، وكان أمين في عمله البسيط، وجاب
وزنة واحدة. يبقى كدا كام في المية؟!

قلت: يبقى مية في المية.

قال: وبكدا هايكون البواب في السما، أفضل من الأب
البطريك ومن الأب الأسقف.

قلت: معقول يا أبونا!!

قال: أيوه يا ابني، لأن دا نوع من العدل، فالشخص ذنبه إيه
إنه ما أخذتش مواهب كتير!! أو شخص تاني إيه فضله إن عنده
مواهب أكثر!! فإن المكافأة تكون "بالنسبة" مش "بالكمية" دا
نوع من العدل.

قلت: كلام منطقي يا أبونا، لكن فيه دليل على كدا؟

قال: دا مش كلامي، دا كلام الإنجيل ومن سير الآباء. هو
مين اللي كان يتصور إن خياط بسيط هايبقى في السما أفضل
من الانبا أنطونيوس أب كل الرهبان، اللي باع كل ماله وأسس
نظام الرهبة في العالم!! مين يتصور إن اتنين ستات متجوزين
وعندهم أولاد، هايبقوا زى القديس العظيم أبو مقار في السما!!
ففي السما هانلاقى مفاجآت كتير، زى ما قال الرب يسوع في
"هوذا آخرون يكونون أولين و أولون يكونون آخرين" (لو ١٣ : ٣٠)

قال: فالمهم تكون أمين في وزنك، حتى لو كانت قليلة.
فياريت كل شخص مسيحي يكون أمين، وما يحتقرش إنه يوزع

اشتياقات الخلاص على كل اللي ييشوفه، فدى حاجة متاحة لكل، والكل يقدر يعملها، ولو عملنا كدا العالم كله هاتغير ويعرف المسيح، وفي النهاية كل واحد مكافأته هاتكون على حسب تعبته ومحبته.

قلت: طيب دا من ناحية المكافأة، لكن إزاي الاشتياقات أو الصلوات البسيطة دى هاتغير الناس؟؟

قال: زى ما قلنا اللي بيغير مش كلامنا، اللي بيغير مش الألفاظ لكن الروح القدس، فالروح بيبقى في الكلام، في الصلاة، في الاشتياقات، المهم الإيمان والمحبة اللي بنقول بيهم الصلوات، واللى بنقدم بيهم الاشتياقات. فما تستهنش بصلوات بسيطة بتصليها، فممكن لما تروح السما تلاقي فجأة حد بيقول:

مينا: "هو دا هو دا"!!

ماركو: اللي حصل!! إيه اللي حصل!!

مينا: أنت اللي خلتنى أعرف المسيح!! شكرا ليك شكرا ليك، أنت انقذتنى، انا هنا بسبيك.

ماركو: إزاي!! بس انا ماشوفتكش قبل كدا، وحتى لو شفتك ما افتكرش إني كلمتك عن المسيح!! إيه الحكاية!!

ميننا: ها احكيلك، وأنا طفل صغير عندي ثلاث سنين كنت مع والدى فى المترو، وانت شفتنى فصليت لى وقلت "حرره ونوره وقده"، ولما كبرت عرفت المسيح وآمنت بيه وبقي اسمى ميننا، ولما جيت هنا شكرت بيتر علشان هو اللى ساعدنى إى أعرف المسيح، فواحد من الملايكة قال لى -"مش بس تشكر بيتر. ضرورى تشكر ماركو، لأنه هو اللى صلى لك لما كنت طفل صغير عندك ٣ سنين.

- إزاي يا ملاك؟!

- وانت صغير كنت مع والدك فى المترو، ولما ماركو شافك صلى لك، ولان الصلاة مش بتموت، لما كبرت الروح القدس عمل فى قلبك، وخلاك تفكر فى المسيح وخلاك تسأل بيتر عن المسيح، فضرورى تشكر ماركو زى ما بتشكر بيتر.

ميننا: فانا بأشكر يا ماركو، باشكرك على صلاتك البسيطة اللى صليتها لى ويمكن إنت نسيتها، لكنها كانت سبب فى إبنى آمن بالمسيح وأجى الحياة الأبدية. شكرا، شكرا كثير. يا ماركو.

قلت: كلام رائع يا أبونا يخلى الواحد ما يطلش يوزع اشتياقات، لكن هل فيه دليل على استجابة ربنا للاشتياقات دى يا أبونا؟

قال: كتير يا ابني، فأى صلاة بنصليها الله بيستجيبها، سواء الصلاة دى فى الكنيسة، فى البيت، فى الشارع، فالله موجود فى كل مكان، والله بيستجيب الصلوات القصيرة، زى ما بيستجيب الصلوات الطويلة، مكتوب فى سفر الأمثال "وَشَهْوَةُ الصَّادِقِينَ تُمْنَحُ" (ام ١٠ : ٢٤).

يعنى بس إننا نشتهي حاجة، الله بيديها لنا، وشهوة خلاص النفوس أجمل شهوة بنقدمها للرب يسوع، فهو جه مخصوص ومات وبذل دمه من خلاص العالم كله، فخلاص النفوس أهم واعظم طلبه نقدر نقدمه للمسيح. وكم ان مكتوب فى سفر المزامير "الرب يصنع إرادة خائفه" (مز ١٤٥ : ١٩).

شفت مكتوب إيه!! الرب بنفسه هو اللى بيصنع إرادة خائفه!! لان إرادة خائفه هي إرادته، والله يريد أن الجميع يخلصون وإلى معرفة الحق يقبلون، فلما تكون صلواتنا واشتياقاتنا من اجل خلاص النفوس، الله هايسمعها ويفرح بيها ويستجيبها، وبرضه مكتوب "هَكَذَا يَقُولُ الرَّبُّ قُدُّوسُ إِسْرَائِيلَ

وَجَابِلُهُ: «اسْأَلُونِي عَنِ الْآيَاتِ. مِنْ جِهَةِ بَنِيٍّ وَمِنْ جِهَةِ عَمَلِ يَدَيَّ أَوْصُونِي. اشع (٤٥ : ١١)

فَاللَّهُ يَقُولُ لَنَا اطلبوا من أجل إخوتكم، ووصوني على عمل إيديا، فالله منتظرنا نعمل معاه، ليه بنتكاسل!! ليه مش مقدرين مشاعره!! ليه مش واثقين إن كل كلمة بنقولها الله بيفرح بيها ويستجيبها!! ليه مش مقدرين قيمة الناس، وأن خلاصهم مهم وغالى عند الرب يسوع. ومكتوب. "وَيَكُونُ أَنِّي قَبْلَمَا يَدْعُونَ أَنَا أُجِيبُ وَفِيمَا هُمْ يَتَكَلَّمُونَ بَعْدُ أَنَا أَسْمَعُ". (اش ٦٥ : ٢٤)

فَاللَّهُ عَارَفَ اللى فى قلوبنا، وكل اشتياق هو ييسمعه ويستجيبه، وأجمل وأعز حاجة على قلب الرب يسوع هو خلاص خليقته. فاستغل الوقت المقتول يا ابني، فى الشارع، فى المواصلات، اشتاق لكل إنسان أنه يعرف المسيح، وزع اشتياقات الخلاص فى كل مكان، فدا مش هايكلفك حاجة، لكن هايكون سبب خلاص لناس كثير، وهاينجيهم من الهلاك الابدى. يقول القديس يوحنا فم الذهب "إن رأيت اعمى سيسقط فى هوة، أما تمد يدك له وتسنده حالا، فكيف لنا أن نرى إخوتنا ساقطين فى مثل هذه المخاطر ولا نمند إليهم يد

الإعانة وهم مشرفون على السقوط فى الحفرة الجهنمية
الخالدة."

فمستوى الاشتياق كلنا مطالبين بيه، فهو سهل وعملى
وفعال، فهو سهل، ففي أي مكان وبكلمات بسيطة، يقدر كل
واحد فينا يبقى كارز ويكون زى التلاميذ، ومن غير ما يروح
دول تانية.

قلت: ما فيش أسهل من كذا!!

**قال: وتانى حاجة الاشتياقات عملية، ففي أوقات كثير
بنسمع عن ضرورة الكرازة.**

**فبنسمع كثير ناس بتقول "ضرورى نكرز. الكرازة مهمة.
كلنا مسئولين قدام الله إننا نكرز بيه ونتكلم عنه"**

لكن ما فيش خطوات عملية للكرازة نقدر نطبقها في حياتنا
اليومية، لكن موضوع الاشتياقات عملي جدا، فما اكر الناس
الى بنشوفها كل يوم، ونقدر نصلى لكل واحد فيهم بسهولة
ونقول "يارب حرره ونوره وقدسّه".

**وتالت حاجة في أهمية الاشتياقات إنها فعّالة، فإنك تصلى
حاجة سهلة، ومافهاش جدل ولا مشاكل مع حد، وما حدش**

ها يقدر يمنعك إنك تصلى له في شرك، وتطلب له الخلاص
ومعرفة المسيح.

قلت: خلاص يا ابونا. من النهاردة مش هاتضيع وقت
وها أوزع اشتياقات الخلاص لكل اللى بأشوفه. كفايا وقت كثير
ضاع. بسبب جهلنا وعدم تقديرنا لقيمة الصلاة وقيمة النفوس.
" يارب يسوع سامحنى، ضيعت وقت كثير وأنا مش عارف
أهمية خلاص النفوس، يمكن علشان ما كنتش واثق في
أبديتى، وما كنتش عارف أهمية الصلاة ولا فاعليتها، كنت
أحسب أن الصلاة هي في الكنيسة وبس، لكن إنك بتسمع حتى
اشتياقات القلب ما كنتش مقدر كدا، خلىنى أقدر قيمة كل
نفس قدامك وإنها تساوى دمك، خلى عندى غيرة وحرارة في
قلبي وأحس بأد إيه كل واحد مهم بالنسبة لك، وخلي أثق إن
كل كلمة وكل اشتياق إن بتسمعه وبستجيبه يارب يسوع.

قال: سرحت في إيه يا ابنى!!

قلت: كلام مهم وخطير يا أبونا. صلى لى علشان أقدر
اعمله.

قال: ربنا يدريك كل نعمة وبركة. نكمل كلامنا المستوى الأول في العمل مع الله هو مستوى الاشتياق، المستوى الثانى هو

مستوى الصلاة.

قلت: طيب إيه الفرق بين مستوى الاشتياق ومستوى الصلاة، مش الاتنين صلاة من أجل الآخرين؟!

قال: مستوى الاشتياق يعنى توزع اشتياقات على كل الناس اللى بتشوفهم إنهم يعرفوا المسيح ويقبلوا فدائه، أما مستوى الصلاة فيكون فيه شيء من التخصيص، يعنى كل واحد بيركز على ٣ أشخاص ودولة، يعنى كل واحد يختار ثلاثة أشخاص بأسمائهم، ويصلى ليهم كل يوم علشان يسنيروا بنور المسيح ويعرفوا محبته.

قلت: دا بالنسبة للأشخاص لكن إيه هي الصلاة من اجل دولة؟!

قال: والصلاة من اجل الدولة، يعنى كل واحد يختار دولة معينة، ويطلب من أجلها كل يوم في نهاية صلاته، زى ما بنصلى في القداس كل يوم ونقول "صلوا من اجل خلاص العالم ومدينتنا هذه وسائر المدن والجزائر والأديرة"

وفي أسبوع الآلام أبونا يصلى ويقول "صلوا من أجل خلاص الله في الشعوب".

قال: يعنى إيه خلاص العالم؟!

قلت: يمكن خلاص العالم من الحروب والأمراض والأوبئة

وحاجات زى كذا يعنى!!!

قال: وهل نهتم ونصلى من أجل خلاص الناس من الأمراض والحروب والأمور المادية، وننسى نصلى من أجل أبديتهم، سامحنى يا ابنى، ما هو اللي مش هايموت النهاردة في الحرب ولا بالمرض، هايموت بكرة موتة طبيعية.

قلت: طبعا كلنا هانموت.

قال: المهم الواحد بعد مايموت هايروح فين، هل ليه أبدية ولا لا؟! فخلاص العالم، يعنى العالم يخلص بمعرفة المسيح وبقبول الفداء، لكن للأسف بقى كل اهتمامنا وحتى تفكيرنا في الصلاة على مستوى المادة، بقينا ميتين (أموات) روحيا. يقول القديس يوحنا فم الذهب "يا لها من خسارة عظيمة في الإخوة، فقليلين هم الذين يهتمون بالأمور الخاصة بالخلاص، ياله من خسارة فجزء كبير من جسد الكنيسة يشبه الميت الذى بلا حراك.

قال: شفت القديس يوحنا فم الذهب يقول إيه على اللى مش بيهتم بالخلاص!! يعنى اللى مش بيهتم بالكراسة، بيقول إنه يشبه الميت!! فالدليل إننا مؤمنين بالمسيح وواثقين ثقة حقيقية فى الأبدية، إننا نهتم بخلاص كل شعوب الأرض.

قلت: طيب مش هي دى مهمة الآباء الكهنة والخدام مش الناس العادية يا أبونا؟!

قال: ليه يا ابني!! هو الكهنة والخدام بس هم اللى هايروحوا السما!! هو الكهنة هم اللى المسيح فداهم وحدهم!! هم الخدام بس هم اللى مسيحيين!! كل شخص وثق فى الغفران والأبدية، هو مسئول إنه يركز بالمسيح، بيقول القديس يوحنا فم الذهب "الشعب أقدر من الأسقف أو الكاهن على الكرازة، إذ يختلطون بالآخرين، فى الأسواق والأعمال والمدارس، فالطفل يمكنه بالأكثر أن يجتذب صديقه الطفل للتمتع بالثالوث القدوس من الكاهن، والشاب صديقه، والسيدة صديقتها".

قال: والصلاة مش محتاجة خدام ولا كهنة، الكل يقدر يصلى، فصلاة الكرازة إنك تختار دولة وتطلب كل يوم من أجلها، إن الله يرسل فعلة وخدام يكرزوا باسمه فيها، وإن كنت

مش هاتروح الدولة دى تركز فيها، لكن تقدر بنعمة المسيح وأنت في مكانك تأثر فيها.

قلت: الصراحة ما إتعودناش على كدا، أول مرة اسمع الكلام دا يا ابونا. بالرغم من إن الكلام شكله مهم وخطير؟

قال: مش بنصلى لإننا مش مقدرين قوة الصلاة، فلو عرفنا أد إيه الصلاة تقدر تغير شعوب، وإنك وأنت في مكانك تقدر تؤثر في دول كاملة، مش هانسكت ابدأ، البابا كيرلس كان رجل صلاة، لأنه كان مقدر قيمة الصلاة. وكان دايما يقول "نحن بالصلاة نحرك اليد التي تحرك العالم كله.

قال: فالصلاة فيها قوة عظيمة، فبالصلاة نعمة المسيح بتعمل بزيادة في القلوب، وتخلي الناس ترجع وتتوب وتأمين بالمسيح، فالقديسة مونيكا ابنها كان عايش في الشر والخلاعة لكنها صلت سنين طويلة وفضلت مثابرة في الصلاة لحد ما اتغير وبقي القديس العظيم أوغسطينوس.

فالصلاة ليها قوة وفاعلية عظيمة، لما كل واحد يأخذ ثلاثة، ويصلى ليهم إنهم يعرفوا المسيح، وإن ماشافش خلاصهم هنا، هایشفوهم في السما، فالصلاة لا تموت.

قلت: وبالنسبة للدولة أصلى ليها إزاي؟

قال: كل يوم لما تيجى تحتّم صلاتك تقول "اذكر يارب دولة كذا، ارسل كارزين يكرزوا بمحبتك وبمعرفة انجيلك خليهم يستنيروا بمحبتك وبنعمتك" واحد من الآباء قال "ياريت كل أسرة تختار دولة ويصلوا ليها مع بعض في المذبح العائلى، محتاجين كل كنيسة يبقى فيها روح الكرازة وتختار دولة معينة وتصلى ليها، يعنى كنيسة تصل من أجل الصين، وكنيسة من أجل الهند، وكنيسة من أجل زامبيا، ويبقى فيه صلاة يوميا في الكنيسة اسمها صلاة الكرازة، يعنى الشباب يتجمع كل يوم ويصلوا صلاة الغروب، وبعدين يرتموا، وكل واحد يصلى من أجل طلبة معينة للدولة دى، واحد من أجل الكارزين، واحد من أجل المسؤولين، وواحد من أجل الاقتصاد، وواحد من أجل الشعب. هي دى الطريقة العملية الوحيدة علشان ترجع روح الكرازة لكنيستنا من تانى"

قال: محتاجين ندرك قيمة صلاتنا، وإن كل شخص مسيحي أدرك معنى الخلاص ووثق في الغفران والأبدية. عليه مسئولية كبيرة، بيقول الأب تادرس يعقوب ملطى

"سر ضعفنا اليوم هو فى نظرتنا الضيقة إلى رجال الكهنوت والخدام، إنهم الفئة الوحيدة العاملة في الكنيسة، هذا المفهوم

كفيل أن يقضى علينا بالجمود، فالكنيسة في حيويتها لا تقبل هذا الروح، بل تنطلق حتى بالأطفال الصغار شهود للمسيح".

قال: فالجميع عليهم مسئولية الكرازة، كل واحد بحسب إمكانياته ومواهبه، فالناس اللى على المعاش والكبار في السن، عندهم طاقة وخبرة ووقت!! ليه يدفنوا دا كله!! ليه مش بيدوروا عن ناس يكلمونهم عن المسيح، ويفرّحوا المسيح بأولاده وهما رايعين ليه؟ واحد من الآباء المباركين قال

"اللى طلّعوا على المعاش عندهم وقت فاضى كثير، دا وقت ممكن يكون بركة كبيرة، ولو استثمروه في الصلاة، هايقدروا يغيروا العالم كله. فممكن يكتبوا أسماء ويصلوا من أجلها بانتظام. فمثلا يوم الأحد يصلوا من أجل الأقرباء. يوم الاثنين من أجل الأصدقاء. يوم الثلاثاء من أجل الجيران. يوم الأربعاء من أجل الكنيسة والخدام. يوم الخميس من أجل مصر. يوم الجمعة من أجل دول العالم. وبكدا يمجّدوا المسيح في آخر أيامهم، ويكونوا كارزين بمحبته ونعمته.

قلت: دا بالنسبة للصلاة، لكن أنا فيه حاجات كثير مش عارفها في اللاهوت. فمثلا لو حد سألني من الشباب في الخدمة وقال لى، هو الله واحد ولا ثلاثة. أقول إيه؟

قال: الله واحد في الجوهر ومثلث في الأقاليم.

قلت: معلى استحملنى يا أبونا. يعنى إيه جوهر ويعنى إيه أقانيم؟!

قال: جوهر الله يعنى طبيعة الله. أما كلمة أقنوم، فهى كلمة سريانية معناها صفة ذاتية. وفيه نوعين من الصفات.

قلت: إيه هم؟!

قال: صفات خارجية بتظهر في تعاملاتى مع الناس، زى لما أقول أنا محب، كريم، بخيل. وصفات ذاتية من غيرها الكيان مايكونش ليه وجود، يعنى لما أقول أنا جسد ونفس وروح، الجسد المادى بياكل ويشرب وينام. والروح هي النفخة من الله، اللى بعد الواحد ما يموت نقول روحه صعدت للسما. والنفس هي العقل والادراك والمشاعر. يبقى كذا انا شخص واحد ولا ثلاثة؟!

قلت: كذا شخص وحد. متكون من جسد ونفس وروح.

قال: فعلا شخص واحد، لكن ليه ثلاثة صفات ذاتية. من غير واحدة فيهم ما اكونش أنا موجود. مثال تانى، الشمس بتتكون من قرص وشعاع وحرارة، كذا يبقى دى شمس ولا ثلاثة شمس؟!

قلت: شمس واحدة.

قال: شمس واحدة، لكن ليها ثلاثة صفات ذاتية، بدون واحدة فيهم ما تكونش الشمس موجودة. زى كدا لكن مع الفارق في التشبيه. الله واحد في طبيعته لكن مثلث الاقانيم.

قلت: طيب ويعنى إيه المسيح ابن الله، هل الله اتجوز وخلف؟!

قال: حاشا لله طبعاً. اللى يقول كدا، بيعبر إن فكره فكر جسدانى مادى. لكن فيه أربع أنواع من البنوة. بنوة جسدية، وبنوة مجازية، وبنوة بالتبني، وبنوة بالطبيعة.

قلت: يعنى إيه يا ابونا؟

قال: بنوة جسدية يعنى واحد اتجوز وخلف. نقول فلان ابن فلان.

قلت: دى سهلة ومعروفة.

قال: تانى حاجة بنوة مجازية، زى ما بنقول ابن النيل، ابن مصر، ابن السبيل. هل معنى كدا النيل اتجوز وخلف نيل صغير؟!

قلت: طبعاً لا. دى حاجة مجازية.

قال: تالت حاجة بنوة بالتبني. يعني واحد اتبني ابن. بقى ابنه بالتربية. أما البنوة الطبيعية يعني من طبيعة الكيان دون أن ينفصل عنه.

قلت: زى إيه؟!

قال: زى لما نقول الشعاع اتولد من قرص الشمس، هل معنى كذا القرص اتجوز وخلف شعاع؟!

قلت: طبعا لا

قال: وهل بعد الشعاع ما اتولد من القرص، هل سابه ومشى؟!

قلت: طبعا لا.

قال: زى كذا مع الفراق، الابن اتولد من الآب قبل كل الدهور، زى ما بنقول في قانون الايمان "نور من نور".

قلت: لكن هل معنى آب وابن يبقى فيه واحد قبل وواحد بعد، أو واحد أكبر وواحد أصغر؟!

قال: لا طبعا، فالبنوة بالطبيعة ما فيهاش فارق زمنى، زى لما بولع عود كبريت، هل بعد عشرة دقائق أو خمس دقائق أقول "ياه دا فيه نار". ولا في نفس الوقت اللي بتتكون فيه النار،

بيتولد فيه الشعاع اللى بأشوفه، وتبتثق منه الحرارة اللى بأحس
بيها!!

قلت: في نفس الوقت اللى النار بتتكون فيه، بيتولد الشعاع،
وتبتثق الحرارة.

قال: زى كدا برضه مع الفارق في التشبيه، منذ الازل، الآب
اتولد منه الابن، وانبتثق منه الروح القدس، لكن التلات إله
واحد، وكيان واحد، منذ الأزل.

قلت: لكن إزاي الله الغير محدود نقول إنه بقى محدود في
شكل طفل صغير؟!

قال: (الله لم يحد، لكن ظهر.)

ففي العهد القديم الله ظهر لموسى في شجرة العليقة أو
العوسجة. وقاله " اخلع حذائك من رجليك لان الموضع الذي
انت واقف عليه ارض مقدسة". وظهر ليه تانى في الجبل لما أخذ
الشريعة، فهل معنى كدا أن الله اتحد في الشجرة أو في الجبل؟!
قلت: طبعا لا ما اتحدث.

قال: فالله اللى ظهر في الشجر وفي الحجر ولم يُحد في العهد
القديم، بنقول عنه في العهد الجديد
"عظيم هو سر التقوى الله ظهر في جسد"

قال: فاللى اللى ظهر في الشجر والحجر ولم يُحد، هل مايقدرش يظهر في شكل الإنسان، اللى هو تاج الخليقة واللى على صورته ومثاله؟!!! زى لما يكون عندنا مباراة في كأس العالم، هل لما بأشغل التلفزيون وأشوف المباراة، هل بأخذ كل الإرسال اللى في العالم كله، وأخليه في الجهاز بتاعى وبس؟! قلت: طبعا لا. الإرسال بيظهر في التلفزيون، لكن بيفضل موجود في كل العالم أي حد يقدر يشوفه.

قال: زى كدا الله ظهر في شكل الجسد، لكن لاهوته فضل مالى العالم كله وفضل غير محدود.

قلت: تمام الله ظهر وما اتحدش. لكن ازاى الله يأكل ويشرب وينام؟! قال:

(لاهوت لله غير مادی. يؤثر ويطهر ويقدس دون أن يتأثر) زى شعاع الشمس لما بيتزل في مكان ملوث، هل بعد شوية نلاقى الشعاع إتلوث أو ريحته اتغيرت؟! قلت: لا طبعا. فالشعاع هو اللى بيظهر وينقى ومش ممكن يتأثر ابدأ.

قال: زى كدا لاهوت الله مش بيتأثر بالأُمور المادية ابدأ، زمان لما كان ييجوا يعملوا سيوف ورماح وسكاكين، كانوا ييجيوا الحديد الخام ويحطوه في النار، وبعدين يطرقوا عليه علشان يشكلوه، هل كدا ييطرقوا على الحديد ولا على النار؟! **قلت:** أكيد على الحديد.

قال: كانوا ييطرقوا على الاتنين، لكن الحديد بس هو اللي بيتأثر، هل النار هاتتأثر بالطرق، سواء قوى ولا ضعيف؟! **قلت:** طبعا النار مش هاتتأثر ابدأ.

قال: زى كدا، الله لما ظهر في شكل الإنسان، اللاهوت ما أتأثرش بالأُمور المادية، لكن الجسد بس هو اللي إتأثر بالأُمور المادية، بالرغم من عن اللاهوت كان متحد بيه.

قلت: تمام اللاهوت ما إتأثرش بالأُمور المادية، زى النار ما إتأثرش بالطرق، لكن إزاي الله يموت. يمكن دى صعب شوية. مش فاهمها يا أبونا!!

قال: الله تجسد، يعني أخذ شكل إنسان كامل، والإنسان الطبيعي لما ييموت، إيه اللي بيحصل له؟! **قلت:** الروح بتفارق الجسد!!

قال: زى كدا المسيح لما مات انفصلت الروح الإنسانية عن الجسد الإنسانى، لكن اللاهوت كان مالى الجسد والروح ومالى كل العالم، ها أقولك مثال يوضح لك كدا. دا إيه يا ابني؟! قلت: دا قلم.

قال: لما نخط القلم دا في طبق ميه، وهو جوا الميه نفصل القلم عن الغطاء بتاعه، يبقى كدا انفصل القلم عن الغطاء، لكن هل القلم أو الغطاء طلع بره الميه؟! قلت: لا الاتنين انفصلوا عن بعض، لكن لسه الاتنين جوا الميه.

قال: زى كدا انفصل الروح عن الجسد، لكن اللاهوت كان يملئ الروح والجسد، ويملى العالم كله، زى مايكون عندنا مباراة بين الاهلى والزمالك. انت اهلاوى ولا زمالكاوى؟! قلت: اهلاوى.

قال: لنفترض كان فيه مباراة بين الاهلى والزمالك، والزمالك فاز، وكان فيه واحد اهلاوى عصبي شوية، اتضايق ومسك حديدة وضرب التلفزيون فانكسر. يبقى كدا اللى اتكسر التلفزيون ولا الارسال؟!

قلت: اللى اتكسر التلفزيون، الارسال مش ممكن يتأثر ابداء.
وهايفضل زى ما هو في المجال كله.

قال: زى كدا اللى مات هو الجسد، لكن اللاهوت مايموتش
ابداء، علشان كدا بنقول

"قدوس الله قدوس القوى قدوس الحى الذى لا يموت"

قال: فلاهوت الله مش ييموت ابداء، لكن اللى مات هو
الطبيعة الإنسانية، يعنى انفصل الروح عن الجسد. فهتم حاجة
يا قلت:.

قلت: فهتم يا أبونا فهم حاجات كتير.

قال: نلخص اللى قلناه النهاردة يا ابنى. النهاردة اتكلمنا عن
مستويات العمل وكان اول مستوى هو

قلت: أول مستوى هو مستوى الاشتياق يعنى أصلى لكل
واحد بأشوفه. وأقول "حرره ونوره وقدسه".

قال: والمستوى التانى هو

قلت: هو مستوى الصلاة. يعنى أخذ ٣ أشخاص ودولة
وأصلى إنهم يدركوا الغفران ويثقوا في الأبدية السعيدة.

قال: واتكلمنا عن شوية أسئلة في التثليث والتوحيد محتاج
تفهمها كويس وبعدا كدا تحفظهم يا قلت:.

قلت: فعلا أسئلة مهمة وأول مرة أسمع ليها إجابات سهلة ومقنعة يا أبونا. **ضرورى يتفهموا ويتحفظوا.**

قال: النهاردة إتكلمنا عن خطوات عملية سواء توزيع اشتياقات الخلاص أو مستوى الصلاة للأشخاص والدولة، وأسئلة اللاهوت. وياريت لو في كنيستك تبدأ مع الشباب في تطبيق صلاة الكرازة كل يوم في الغروب. ومع أسرتك تختاروا دولة وتصلوا لها كل يوم.

قلت: بنعمة ربنا هااعمل كدا يا أبونا صلواتك كتير يا أبونا علشان أقدر أكمل.

قال: صلاة أمنا العدرا وكل القديسين.

قلت: سلام يا أبونا.

قال: سلام يا ابني ربنا معاك وبياركك. بنعمة ربنا نتكلم المرة الجاية عن المستوى الثالث وهو مستوى الكلام.